



## फेइसबुक आरो वाट्स-एपाव बाहायजानाय बर' राव आरो हांखो (Bodo language and script used in Facebook and WhatsApp)

गुनेस्वर औवारि एम.ए.

बड'लेण्ड मुलुगसोलोसालि, कक्राइर, बि.टि.आर., आसाम

### गुबै बाथ्रा

सावरायसंनाय आयदा 'फेइसबुक आरो वाट्स-एपाव बाहायजानाय बर' राव आरो हांखो'आव बर' रावखौ फेइसबुक (मोखां बिजाब) आरो वाट्स-एपाव हांखोजौं बाहायनायनि आखुथाइ, दाथाइ, हांखोफोरखौ संजिरनाय जादों। सरासनस्रायै, बर' रावारिफोरा बर' रावखौ बाहायनानैसो मोखां बिजाब आरो वाट्स-एपाव बाहायो आरो बे थासारियाव रॉनाय-रोडि बयबो बाहागो लायो। बे बिथिडाव बर' रावनि हांखोनि बाहायनाय सोलायनाय एबा सोलायैखौं बे सावरायसंनायनि गेजेरजों फरायग्राफोरनो खारि होनो हानायानो गुबै नोजोर। बे सावरायसंनायनि थाखाय गासै आंनि मोखां बिजाबनि लोगोफोरनि बानबुंथि (कमेन्ट) आरो फिन हरनायफोरखौ (रिप्लाइ) नोजोर होनानै आरो लोगोफोरजों वाट्स-एपाव खौरां लालायनायनि गेजेराव बाहायनाय बर' रावनि हांखोफोरखौ नोजोर होनानै खारिफोरखौ जथायना लानाय जादों। बे खारिफोरखौनो बिजिरलु नोजोरजों संदानानै बे बिजिरसंलाइखौ आबुं खालामनाय जादों।

बेनि गेजेरजों बर' रावखौ मोखां बिजाब आरो वाट्स-एपाव बाहायनायनि बागै मिथिनो हानाय जादों। बर' रावखौ रेबनो थाखाय बै मोननैबो सुबुं बिजोडाव बर' आरो रमान हांखो बाहायनाय जायो। बेनिनो गेजेराव रमान हांखोजों बाहायनायनि बिथिडाव हांखोनि, रिंसारनि बाहायनाया जेथो गोनां, खायफा रिंसारखौ आन्दो खालामना एबा गुसुंधारै बाहायनानै बर' रावनि सोदोबखौ रेबो। बेफोर बाहायनाया बाहायगिरिनि गोसो, गियान, लुबैनाय, समनि सायाव सोनारनानै जायो। बे खारिफोरा फरायगिरिफोरनो मोनसे गोदान सानदांथि होफैनो हागोन होनना आरो गोदान सावरायसंगिरिफोरखौ थुलुंगा हागोन होनना मिजिं थिनो हायो।

**मादा सोदोब:** फेइसबुक; वाट्स-एपा; बर' हांखो; रमान हांखो

## 1. जागायनाय

फेइसबुक आरो वाट्स-एपा गोनोखोनि आरो इन्टारनेटनि जौगानायाव संदानना फोसावजानाय मावबाख्रि (एप्स/एफ्लिकेसन)। बेफोर मावबाख्रिया आथिख्रालाव गावनो जुनिया मिथिगा उदां (free nature) गंसे समाज सोर्जिना गावजों गाव सुबुंफोरखौ बे समाजाव गोदानै थानानै थानोबो खाबु होदों। खौरां हरनाया बांसिनै लिस्नानै वाट्स-एपनि मददजों दैथायजादों आरो गोसोनि साननायखौ गावजों गाव सानैनि गेजेराव फोरमायलायनानै लानो हानाय जादों। बेबादिनो मोखां बिजाबावबो गावनि मावनाय, साननाय बायदिफोरखौ समाजारि महरै फोरमायना होनो हानाय जादों आरो खौरां दैथायलायनायनि एबा फोसावलायनायनि खाबुवा गोलैसिन जानानै फेदों। मोननैबो गोनोखोआरि खान्थिजों दाजानाय समाज सोर्जिना मुलुगावनो जांख्रिखानाय लानानै होफेदों। दा बयबो थानानै थानो थाखाय वाट्स-एप आरो मोखां बिजाब मोननैखौबो बाहायथारनांगौबादि जानानै दंब्लाबो सानफ्रोमबोनि संसारनि जाथाइखौ गोदानै फोरमायथिना होनायाव (आपडेइट) आरो फालांगि बिथिडावबो बे मोननैबो मावबाख्रिया (एप्स) थोंजों नेहाथारिबादि खामानि मावो। खौरांफोरा जोबोद गोख्रैथिजों दैथायजानाय जानानै फेदों।

मोखां बिजाब आरो वाट्स-एपा मोननैबो आरोदामिनारि मावबाख्रि (टेक्न'ल'जिकेल एप्स)। मोखां बिजाब मावबाख्रिखौ गिबियै आरोदामिनगिरि मार्क जुकारबार्गा आमेरिकानि केलिपर्नियायाव इं 2004 माइथायनि 4 फेब्रुवारियाव फसंजेन्दोमोन। बे मावबाख्रिखौ फसंथानायाव बिनि थाखोनि लोगो एडुवार्ड साथ्रिन, एनद्रिउ मेक-कलुम, दास्टिन मस्क'भिट्स आरो क्रिस हिउजमोनाबो मार्क जुकारबार्गखौ मदद होदों। वाट्स-एपखौबो जैन कम आरो ब्रियान अक्टनमोना फसंथादों आरो बेयो मोखां बिजाबनि मददाव जौगाखानाय। वाट्स-एप बाहायनानै रायलायहरनो, मोखां नायलायनो, खारि फोसावलायनो गोलैसिन जादों। बे खाबुखौ मोखां बिजाबाव मोननाय जाया। बेखौ इं 2009 माइथायनि 24 फेब्रुवारियाव बाहायखेवनाय जादों।

मोखां बिजाब आरो वाट्स-एपखौ गोथां खालामनो थाखाय रावनि गोनांथि जायो आरो रावजोंसो बे बिजोडाव सुबुडा सुंजोबनानै लाखिनो हायो। राव गैयामोनब्ला बेफोर मोननैबो गोनोखोआरि मावबाख्रिया खारिजे (इन्टारनेट) दंब्लाबो जेबो उदायि जानानै थागौमोन। बैफोर मावबाख्रिफोरखौ रावा मोनसे जिउबादि फोथानानै लाखिना दं। जाय रावखौ जों सुबुंफोरा बाहायगासिनो बे रावानो मोखां बिजाब आरो वाट्स-एपनिबो राव महरै बाहायजागासिनो दं आरो बेखौ लिस्नानै बाहायगासिनो दं। मोखां बिजाब आरो वाट्स-एपाव रावखौ रायलायनो थाखाय गारां होनाय जाया बाहायगिरिफोरा, थोंजों सोदोबखौ हांखोजों लिस्नानै गावनि साननाय आरो मोन्दानायखौ फोरमायनाय जायो। बेबादिनो रावखौ बैफोर समाजारि बिजोडाव बाहायो। बेबादिनो बर' रावखौबो बर' सुबुंफोरा बैफोर मावबाख्रियाव बाहायनानै गावनि साननायफोरखौ फोरमायो, गावजों गाव खौरां लालायो। बर' रावखौबो गारां होआलासे एबा माब्लाबा राव गारां (भइस कल) (वाट्स-एपनि बिथिडाव) बाहायनायखौ मोनो।

## 2. आयदानि सिनायथिनाय

बे सावरायथाइनि आयदाखौ मोखां बिजाब आरो वाट्स-एपनि बाहायनायाव बर' रावनि बाहायनाय आरो बाहायजानायनि आखुथाइखौ नोजोर होना नै थि खालामनाय जादों। समाजारि बिजों एबा गोनोखोआरि सुंजोब मावबाखि मोखां बिजाब आरो वाट्स-एपाव रावखौ गारां होआलासे हांखोजों लिरनानै बाहायगिरिफोरा गावनि साननायफोरखौ फोरमायथिना होयो। बे फोरमायथिजानाय साननायफोरा गाछि एबा मोजां जानो हायो। बे आयदायाव बर' रावनि बाहायजानायनि बागै सावरायनो लानाय जादों बेखायनो आयदाखौ बर' रावजों सोमोन्दो लाखिनानै थि खालामनाय जाबाय आरो राव गारां (भइस कल) बाहायनानै वाट्स-एपनि हेफाजाबै खौरां लालायनो हानायबो जायो। नाथाय बेखौ बे सावरायथाइयाव सावरायसंनाय जानाय नडा। मानोना राव गारां बाहायनानै खौरां लालायनाय समाव जाबादि बर' रावखौ बाहायो बेखौ रायलायनाय समाव बर' सुबुंफोरा बाहायखायो आरो जेबो फारागथि एबा सोलाय-सोल' जानायखौ बे थासारियाव नुनो मोननाय जाबांखाया। बर' रावा मोखां बिजाब आरो वाट्स-एपाव बाहायजानाय समाव लिरनानै बाहायजायो आरो बेयाव सोलाय-सोल' आखुथाइ मोनो आरो बे थासारिखौ सावरायसंनो गोनांथि जानायनि थाखाय बे सावरायथाइ 'मोखां बिजाब आरो वाट्स-एपाव बाहायजानाय बर' राव आरो हांखो'खौ थि खालामनाय जाबाय।

## 3. गोनांथि

मोखां बिजाब आरो वाट्स-एपाव मावबाखिखौ बर' मानसिफोराबो बाहायो। बर' मानसिफोरनि मादाव गोबां रॉनाय-रोछि मानसिफोरा बाहायनायनि बिथिडाव बर' रावखौ लिरनो गोनां जानानै फैंयो। बे थासारियाव, रॉनाय-रोछैखौ लानानै राव बाहायनायाव सोलाय-सोल' फैंखायो। जाय रावखौ मोजाडै फरायनो रोडा बिनि लिरनाय बर' राव आरो गुबुन सासे गोरों मानसिनि लिरनायनि गेजेराव फाराग जानानै फैंखायो।

बर' सुबुंफोरा बर' बिजोंल' फरायनानै बर' लिरो बे नडा; माखासे एबा गोबां बर'फोरा खायफा बर', खायफा इंराजि, खायफा हिन्दी, खायफा असमिया, बायदि बिजों फरायनानै गोरों जायो। बैसोर गुबुन बिजोंनिफ्राय रॉनानै फैंनाय बर'फोरा बर' रावखौ बर' (देबनोगोरि) हांखोजों मोजाडै रेबनो रोडाबो जानो हायो। बे बिथिडाव बर' रावनि बैफोर समाजारि बिजोंफोराव बैसोरजों बाहायजानाय बर' रावा सोलाय-सोल' जानो हागौ।

मोखां बिजाब आरो वाट्स-एपाव बर' रावारि मानसिफोरा बर' रावजों लिरनो गोब्राब मोननाय आरो गोबाव सम लानायनि थाखाय बर' रावखौ रमान हांखो बाहायनानै लिरनायखौ बांद्रायथारै मोनो। बे बिथिडाव बर' रावखौ रमान हांखोजों रेबनाया फरायसंनो गोनां आरो रावनि महरा एफा-एनै सोलायनायाथ' जाखायो बेयो रोखा। मानोना मालाय रावनि हांखोआ बर' रावनि रिसारफोरखौ फोलोमनानै होनो हाया।

माखासे बर' मानसिफोर दं जायफोर बर' रावखौ मोजां रॉसारा। बिसोरो समाजारि बिजों मोखां बिजाब आरो वाट्स-एपावफोराव बर' रावखौ लिरनाय समाव सोलाय-सोल' जाबोनायखौ नुनो मोनो।

दा सुबुंफोरा गुसुं लामायारि। जेखि खामानि एबा बाथ्रा फोरमायनाय जायाथों गुसुडै जानायखौ लुबैयो। बे बिथिडाव बर' सुबुंफोराबो बर' रावनि सोदोबफोरखौ गुसुडै बुंनानै लिरना फोरमायनो नाजायो। बे थासारियाव रावनि आखुथाइ एबा लिरनाय महराव सोलायनो हायो।

बैफोर गोजौवाव मख'बोनाय थासारिफोरखौ लानानै मोखां बिजाब आरो वाट्स-एपाव बाहायजानाय बर' रावखौ सावरायसंनो गोनांथि दं होन्नानै सानो।

#### 4. थांखि आरो नोजोर

बर' रावारि मानसिफोरा गुबुन रावारि मानसिफोरबादि गोदानै मोखां बिजाब आरो वाट्स-एपाव समाज सोर्जिबाय आरो बे समाजखौ लिरनाय रावजों सामलायो। बे थासारियाव बर' रावनि बुंथिगिरिफोरा बर' रावखौ लिरनायाव सोलाय-सोल' जाहोनायखौ नुनो मोनो। गाहायाव माखासे थांखि आरो नोजोरखौ लानानै बे सावरायथाइखौ थि खालामनाय जादों।

बर' रावखौ समाजारि बिजों मोखां बिजाब आरो वाट्स-एपाव माबादि बाहायो बेखौ मिथिनो नाजानाय जादों आरो बेनि गोनांथिबो दं।

समाजारि बिजोंफोराव बाहायजानाय बर' रावनि गियानखौ मिथिनानै गुबुनफोरनोबो मिथिहोनो लुबैदों आरो मिथियोबा गोदान संजिरगिरिफोरनि नोजोरा जाहाथे बे आयदायाव गोगलैथों बेखौ थांखि आरो नोजोर होनाय जादों।

मोखां बिजाब आरो वाट्स-एपाव बाहायग्रा बर' मानसिफोरखौ सोर गोरों सोर रोडि नेवसिनो हाया आरो बिसोरनि गेजेराव रॉनाय रोडि मोनसे समानथि जौसां महर मोनो। बे थासारियाव माबादि बर' रावनि महरा नुजासारदों एबा नुजासाराखै बेखौ मिथिनो थांखि आरो नोजोर होनाय जादों।

#### 5. बिजिरसंनायनि आवथा

मोखां बिजाब आरो वाट्स-एपावखौ गोथां खालामनो थाखाय बर' रावारिफोरा बर' रावखौ बाहायो आरो गावजों गाव सुंज्रोबलायनाया जायो; लोगोसे गुबुननि सिगाडाव गावनि सानमोन्दांथिफोरखौ बाहायगिरिफोरा फोरमायना फोस्रावो। बेबादि खामानियाव रॉनाय एबा रोडि मोननैबो थाखोनि मानसिफोरा बर' रावखौ बाहायो। रमान हांखोखौ बाहायनानै बर' सुबुंफोरा बांसिनै गावनि साननायखौ फोरमायनाया जासिनो आरो खायफा बर' हांखोखौबो बाहायो। बे बिथिडाव हांखोनि महरनि सोलाय-सोल' जानायनि सायाव सावरायसंनो गोनांथि दं। बर' रावा मोखां बिजाब आरो वाट्स-एपाव हांखोजों बाहायजानाय समाव हांखोनि बिथिडाव सोलायनायखौ नुनो मोनो आरो बाहायगिरिफोरा गावनि सुबिदाबादि हांखो बाहायना बर' सोदोब रेबनायखौ मोनो। सावरायसंनो लानाय आयदानि थाखाय मोखां बिजाबाव आरो वाट्स-एपाव खौरां लालायनाय आरो साननाय-हनायखौ फोरमायलायनायखौ नोजोर बोनानै बै मोननै मावबाखिखौ (एप्स) सावरायसंनायनि थावनि हिसाबै आजावनानै लानाय जादों आरो बे बिजिरसंनायखौ आबुं खालामनो नाजानाय जादों।

## 6. थुनलाइनि नुजासारथि

मोखां बिजाब आरो वाट्स-एपाव मावबाख्रिफोरा आरोदायारि समाजारि बिजों। बर' रावखौ बाहायनानै बर' सुबुंफोरा बे समाजारि बिजोंनि समाजखौ फोथानानै लाखिदों। मोखां बिजाब आरो वाट्स-एपाव बाहायनाय बर' रावनि बागै जेबो थुनलाइआरि सावराइथाइ मोननो हानाय जायाखै।

## 7. खारि जथायनाय आदब

खारि बुथुमनायनि थाखै बिजिरसंगिरिया गावनो मोखां बिजाब आरो वाट्स-एपाव मावबाख्रिखौ (एप्स) बाहायदों। बाहायनायनि गेजेरजों गावनि लोगोफोरजों खौरां लालायदों आरो बर' रावखौ रेबनानै साननायखौ लोगोफोरजों फोरमायथिलायदों। बेबादिनो मोखां बिजाबाव मोखां बिजाबारि लोगोफोरनि बिबुंथिफोरखौ (कमेन्ट) नोजोर होनाय जादों, बर' रावखौ माबोरै बाहायदों आरो रेबदों। बिजिरसंगिरिया गावबो गावनि लोगोफोरजों फिननाय (रिप्लाइ) होलायनायबो जादों आरो बै समाव माबादि बर' सोदोबखौ रमान हांखो बाहायना रेबखो बेखौ नोजोर लाखिनाय जादों आरो खारिखौ जथायनाय जादों। बेबादिनो लोगोआ माबादि बिबुंथि (कमेन्ट) आरो फिननाय (रिप्लाइ) लिरदों बर' रावजों बर' हांखो एबा रमान हांखो बाहायना, बेफोरखौनो नोजोर होनायै खारिखौ थि खालामनाय जादों। बेबादिनो वाट्स-एपाव बाहायनानै बिजिरसंगिरिया गावनो लोगोफोरजों खौरां लालायदों लोगोसे बर' रावखौ रेबनानै माबादि बाहायना खौरां लानाय जादों बेखौ नोजोर होनायै खारिथिखौ साजायना लादों आरो लोगोफोरा माबादि फिननाय हरनायाव बर' रावखौ बाहायखो बेखौबो नोजोर होनायै बे सावरायसंनायखौ आबुं खालामनो खारिखौ बुथुमनाय जादों। बुनो थाडोब्ला बिजिरसंगिरिया गावनो बे सावरायसंनायखौ लिरगिरि जानानै थोंजों (प्राइमारि) आरो खेंसालिया (सेकेण्डारि) खान्थिजों बिजिरलु आदब (एनालाइटिकेल मेथड) बाहायनानै खारिफोरखौ बुथुमना साजायनानै जथायनाय जादों।

## 8. सिगांग्रो सानमिजिं

सावरायसंनायनि सिगां सिगां गिबियावनो आयदानि सावरायसंनायनि माबा मोनसे फिथाइखौ होनो सानो आरो सरासनस्रायै, बेखौ होनो हाहैयोबासो सावरायसंगिरिनि बुंथिनाया आबुं जायो। बे सावरायसंनायनि गेजेरजों बर' रावा मोखां बिजाब आरो वाट्स-एपाव माबादि बाहायजाखो एबा बाहायजागासिनो दं बेनि बागै सुंद'वैब्लाबो फरायगिरिफोरा मिथिगोन होन्नानै सानो। बर' रावा मोखां बिजाब आरो वाट्स-एपाव बाहायजानाय समाव रिसार गैयालासेबो जायो आरो बे थासारियाव हांखोनि बाहायनाया मैखोमै बिफाव लानांगौ जानानै फैयो। जेहेथु लिरनानैसो सानस्रिखौ बुंथिलायनाया जायो। बेखायनो बर' रावखौ मानगोनाडै लिरनाय खान्थिजों आरो मोखां बिजाब आरो वाट्स-एपाव लिरनायनि गेजेराव फारागथि जानायखौ थारैनो बे सावरायसंनायनि हेफाजाबै मिथिनो हागोन बेखौ मिजिं थिबाय। बर' रावारि जानानै बेबादि बर' रावनि हांखोआरि बाहायजानायनि मिथिनो हानाया आरो बेखौ गोदान संजिरगिरिफोरा

फरायथिनो मोनोब्ला गोदानै बर' रावखौ मोखां बिजाब आरो वाट्स-एपाव बाहायजानायनि महरखौ संजिरनो थुलुंगा जागोन होनना बे सावरायसंनायनि सिगांग्रो सानमिजिंखौ थि खालामनाय जाबाय।

## 9. बर' रावनि सुंथाब फोरमायथि

बर' रावा सा-सान्जा भारतनि मोनसे राव। भारतनि संबिजिरनि दाइनथि फारिलाइनि गनायथि गोनां आरो तिब्बत-बामारि राव फोलेरनि मोनसे मख'जाथाव राव। बर' रावादि तिब्बत-बामारि राव फोलेरनि मोनसे राव होन्नानै रावनि संजिरगिरि पि.के. बेनेडिक्ट, जि.ए. ग्रियेर्सन, रबार्ट शेफार, बानि कान्ट काकति, सुनिती कुमार चेतार्जि, पि.सि. भट्टाचार्यमोना बर' रावनि बागै फोरमानबो होलांदों। सा-सान्जा भारतनि गासैबो राइजोआव गोसारनानै दं बर' रावा आरो भारतनिनो सोनाब बेंगलावबो गोसारनानै दं। बेनि अनगायैबो नेपाल, बांलादेश आरो भुटान हादोरावबो एफा एनै गोसारनानै दं। बर' रावा गुबुन गुबुन हादोराव आरो जायगाफोराव रावसा महरै गोसारनानै दं। सोलोथाइनि बिथिडाव बर' रावनि मान थाखोआ बारायगासिनो दं। तिब्बत-बामारि राव हान्जानि मोनसेल' ट्राइबेल राव अदेबानि बर' रावाल' भारतनि दाइनथि फारिलाइयाव जायगा होजादों।

बर' रावखौ लिरनो थाखाय गोजोरै देबनोगोरि हांखो बाहायनाय जायो। बर' रावनि गारां रिसारथिया गुबैयै मोनद' आरो खौरां रिसारथिया मोनजिद'। मोनजिद' खौरां रिसारथिनि अनगायै माखासे रिसारथिफोरखौ दाहार सोदोबफोराव बाहायनाय जायो।

## 9. मोखां बिजाब आरो वाट्स-एपाव बाहायजानाय बर' रावनि हांखो

मोखां बिजाब आरो वाट्स-एपाव बर' रावखौ रेबनो थाखाय बर' सुबुंफोरा हांखो बाहायो। हांखो बाहायनानै गावनि साननाय-हनाय आरो खौरां लालायनाय खामानिखौ मावो लोगोजों एबा आंगोफोरजों। जिउनि माखासे नांथारगौ खामानिखौबो बैफोर समाजारि बिजोनि मावबाखिफोरनि (एप्स) हेफाजाबै मावफुंनानै लानाय जायो। रेंनाय-रोडि मोखां बिजाब आरो वाट्स-एपाव खौरां बाहायनायाव बर' सुबुंफोरा मोननै रोखोमनि हांखो बाहायनाय जायो। बेफोरो जाबाय-

1. बर' हांखो (देबनोगोरि), आरो
2. रमान हांखो

### 10.1 बर' हांखो

बर' हांखोखौ देबनोगोरि होन्नानै मिथियो। बर' रावारिफोरा गावनि रावनि हांखो होन्नानै देबनोगोरि हांखोखौ इं 1975 माइथायाव गनायना लादों। बेनि सिगां रेबनाय हांखो हिसाबै गमान हांखो आरो बेनि सिगाडाव असमिया आरो बेनि सिगांथाराव बांला हांखोखौ गावनि बर' रावनि रेबहांखो हिसाबै गनायना बाहायबोदोंमोन। सरखारि एबा मानगोनां बाहायथि बादियै दायो बर' रावारिफोरा देबनोगोरि हांखोखौ आबुडै आजवावनानै लानानै बाहायगासिनो दं आरो बाहायलांबाय थासिगोन।

मोखां बिजाब आरो वाट्स-एपाव रावखौ रेबनो थाखाय बर' रावारिफोरा देबनोगोरि हांखोखौ बाहायनाय जायो। नाथाय रमान हांखोखौ बाहायनायनि बिसान एबा बिबांखौ नायोब्ला मिथियोदि बर' हांखोखौ (देबनोगोरि) बाहायग्रा बर' रावारिनि बिसाना मोखां बिजाब आरो वाट्स-एपनि बिथिडाव बाडाइ। बर' हांखो एबा देबनोगोरि हांखोखौ बर' रावारि मोखां बिजाब नायगिरि आरो वाट्स-एपाव बाहायनायनि फारसे नोजोर होयोब्ला नुनो मोनोदि लिरबिदां लिरनानै फोसावनायनि बिथिडाव बांसिन। गावनि सानस्रिखौ फोरमायनो थाखायबो बाहायो आरो बेनि बिसाना लिरबिदां लिरना फोसावनायनि हिसाबाव खम। माखासे मोखां बिजाब आरो वाट्स-एप हान्जानि (ग्रुफ) मान लाखिनो थाखाय आरो गावनि मानगोनो हांखो हिसाबै बर' रावारिफोरा मान होनानै गावनि रावारि हांखोखौ बाहायो। बिथामोना जायफोर बर' हांखोखौ बाहायो बिसोरबो माब्लाबा समाव रमान हांखोखौ बाहायनानैबो फिननाय एबा बिबुंथिनाय होयो (रिप्लाइ आरो कमेन्ट)।

बर' हांखोखौ बर' राव रेबनो थाखाय मोखां बिजाब आरो वाट्स-एपाव बाहायनायनि बिथिडाव बर' रावखौ जेरै सोलोथाइ लानाय एबा रेबनाय एबा थुनलाइयाव बाहायो थि बे एखे रोखोमैनो सोलाय-सोल' गैयाजासे बाहायो। थोंजोडै बुंनो थाडोब्ला बर' रावखौ रेबनो थाखाय बाहायनाय हांखोखौनो एखेयैनो मोखां बिजाब आरो वाट्स-एपाव सानस्रि फोरमायनाय समाव बाहायनाय जायो। मोनद' गारां रिसार- {अ, आ, इ, उ, ए, ओ} आरो मोनजिद' खौरां रिसार- {ख, ग, ड, ज, थ, द, न, फ, ब, म, य, र, ल, व, स, ह}। मोखां बिजाब आरो वाट्स-एपाव बैफोर रिसारफोरखौ सोदोबाव जेरै बाहायो बेबादिनो बाहायनाय जायो। रिसारथिनि मोनबो सोलाय-सोल' जाया आरो रावखान्थि आरो राव बिगियाननि उत्थायै मोनबो बिथिडाव बाहायनाय जाया।

## 10.2 रमान हांखो

बर' रावखौ मोखां बिजाब आरो वाट्स-एपाव बर' हांखोनि अनगायै रमान हांखो बाहायनानै रेबनाय जायो। रमान हांखो बाहायनानै गावनि सानस्रि फोरमायग्रानि बिसाना मोखां बिजाब आरो वाट्स-एप मावबाख्रियाव बर' हांखो बाहायग्रानि अनजिमानिखुइ बांसिन। बिबुंथिनाय आरो फिननाय (कमेन्ट आरो रिप्लाइ) होनायाव बांसिनानो रमान हांखो बाहायनानै बर' रावखौ रेबनाय मोनो। बायदि खौरां लालायनाय समावबो इंराजि रावखौ रेबनानै बाहायनाय जायो। बर' रावखौ रेबनो थाखाय रमान हांखो-हालानि मोन नैजिनै हांखोखौ- {a, b, c, d, e, g, h, i, j, k, l, m, n, o, p, r, s, t, u, w, y, z} बाहायो।

| रमान हांखो | बर' हांखो | बर' सोदोब (रमान हांखोजो आरो बर' हांखोजो) |
|------------|-----------|--|
| /a/        | /आ/       | /ag/ /आं/, /asan/ /आसान/, /ma/ /मा/      |
| /b/        | /ब/, /बि/ | /bug/ /बुं/, /bay/ /बाय/, /hbab/ /हाबाब/ |
| /bma/      | /बिमा/    | /mably/ /मा बिलाय/, /mab/ /माबि/         |

|          |                |  |
|----------|----------------|--|
| /c/      | /सि/           | /cmang/ /सिमां/, /bcbang/ /बिसिबां/, /mac/ /मासि/  |
| /d/      | /द/, /दि/ /दे/ | /dg/ /दं/, /gadob/ /गादब/,   |
| /bad/    | /बाद/          | /bd/ /बिदि/  |
| /dgly/   | /देग्लाइ/      | /mad/ /मादे/, /d/ /दे/   |
| /e /     | /इ/ /ए/        | /edi/ /इदि/, /edao/ /एदाव/, /mel/ /मेल/, /de/ /दे/   |
| /g/      | /ग/ /जि/       | /gola/ /गला/, /bugao/ /बुगाव/, /dg/ /दं/, /gb/ /गिबि/, /bg/ /बिजि/   |
| /h/      | /ह/            | /hya/ /हाया/, /gham/ /गाहाम/, /bah/ /बा!/  |
| /i/      | /इ/ /य/        | /id/ /इदि/, /simag/ /सिमां/, /mai/ /माइ/, /sai/ /साय/, /rai/ /राय/   |
| /j/      | /ज/            | /jadg/ /जादों/, /paja/ /फाजा/, /गैया/  |
| /k/ /kh/ | /ख/            | /klma/khlma/ /खालामा/, /bka/ /बिखा/, /bkha/ /बिखा/   |
| /l/      | /ल/            | /la/ /ला/, /jla/ /जाला/, /betal/ /बेथाल/   |
| /m/      | /म/            | /mla/ /माला/, /jamba/ /जामबा/, /wgkam/ /ओखाम/  |
| /n/      | /न/            | /nja/ /नाजा/, /mno/ /मान', /gwjan/ /गोजान/   |
| /o/      | /अ/ /व/ /उ/    | /onty/ /अन्थाइ/, /gola/ /गला/, /mno/ /मान',<br>/aosao/ /आवसाव/, /mao/ /माव/, /ausau/ /आउसाउ/,<br>/au/ /आउ/ |
| /p/ /ph/ | /फ/            | /pwtai/phwtai/ /फोथाय/, /mpry/amphry/ /ओमफ्राय/  |
| /r/      | /र/            | /r/ /आरो/, /r/ /र', /kabrag/ /खाब्रां/, /gtar/ /गोथार/   |
| /s/      | /स/            | /sanprmbw/ /सानफ्रामबो/, /msa/ /मोसा/, /tws/ /थोस/   |
| /t/ /th/ | /थ/            | /tag/ /थां/, /mntam/mntham/ /मोनथाम/, /tw/ /थोथ/,<br>/thya/ /थाया/, /dwth/ /दोथ/                           |
| /u/      | /उ/ /व/        | /unao/ /उनाव/, /mauji/ /मावजि/, /jiu/ /जिउ/, /mau/ /माव/   |
| /w/      | /ओ/ /व/        | /wu/ /औ/, /gwtag/ /गोथां/, /whw/ /ओहो/, /awry/ /आवराय/,<br>/maw/ /माव/                                     |
| /y/      | /य/ /इ/        | /raydg/ /रायदों/, /maly/ /मालाय/, /maynao/ /माइनाव/,<br>/may/ /माइ/  |
| /z/      | /ज/            | /zayakwi/ /जायाखै/, /gzaka/ /गाजाखा/, /gzerau/ /गेजेराव/   |
| /ng/ /g/ | /ङ/            | /agjwg/ /आंजों/, /cmag/ /सिमां/, /hngkur/ /हांखुर/,<br>/srag/ /सां, सोरां/                                 |

रमान हांखोफोरखौ बर' रावनि सोदोब रेबनो थाखाय गावारि खान्थिजों (idiolect) बर' रावारि मानसिफोरा मोखां बिजाब आरो वाट्स-एपाव मावबाखियाव बाहायो। बेनिनो मोनद' /f, q, v, x/ हांखोखौ



बाहायनाय मोननाय जाया। बाहायजानाय रमान हांखोनि मादाव /z/-खौ खमसिनथारै बाहायनायखौ मोखां बिजाब आरो वाट्स-एपाव मोनो। मोनसे रमान हांखोखौ बर' रावनि हांखोनि रिसारबादियै मोननै महरैबो बाहायनाय नुनो मोनो। गोजौनि बिदिन्थिफोराव माखासे हांखोखौ सोदोबनि सिगां आरो जोबथा थावनियाव बाहायनाय जाया। बेयो बर' रावनि सोदोब हांखो थानायनि थासारिखौ नायना जायो। बांसिन हांखोनि बाहायथिफोरानो गावनि असे एबा सोदोबनि गुबै रिसार होनो थाखाय बाहायजानाय जाया आरो जानायबो जानाय मोनो।

### 11. रिसारथिफोरनि बाहायथि महर

मोखां बिजाब आरो वाट्स-एपाव बर' रावखौ रिसार होनानै बाहायनाय जाया। हांखो बाहायनानै बुजिनो थाखायल' बाहायनाय जायो आरो बेखौ फरायग्रा एबा खौरां रेबग्राया गावजों गाव मिथिलायखायो। बैफोर मोखां बिजाब आरो वाट्स-एपाव मावबाख्रिखौ बाहायग्राफोरा बेफोराव बाहायजाखानाय राव आरो हांखोनि बागै खारि दंखायो। गोदान बाहायगिरिया गियान गैबाङ्गि जानायनि थाखाय बैफोर मावबाख्रियाव बर' रावनि रेबनानै बाहायजानायनि ओंथिखौ मिथिख'वा मिथिख'वा जायो। गोजौवाव मख'बोनाय रमान हांखोखौ बर' रावखौ मोखां बिजाब आरो वाट्स-एपाव मावबाख्रियाव खौरां फोरमायलायनो बाहायनाय जायो।

बर' रावनि हांखोखौ जेरै मानारि खान्थियै बाहायनाय जायो सोलोंथाइ आरो रेबनाय थुनलाइफोराव थि बेबादिनो मोखां बिजाब आरो वाट्स-एपावबो बाहायनाय जायो। जेबो गोदान महरखौ मोननाय जाया। नाथाय रमान हांखोखौ बाहायनानै रेबनानै फोरमायनायफोराव रिसारफोरनि बाहायजानाया गोसोबादि जायो। सानस्रि फोरमायग्राया गावनि गोसोबादि हांखो जथायनानै सानस्रिखौ गावनि लोगो एबा आंगोनो फोरमायनो नाजायो। रमान हांखोफोरखौदि रोखा गोजौवाव बाहाय बिदिन्थि फोरमायबोनायबादि बाहायथारनांगौ एबा बाहायथारो बेबो नडा। मोखां बिजाब आरो वाट्स-एपाव बाहायनाय रमान हांखोनि महर एबा आखुथाइखौ गाहायाव मख'लांनायबादि मोनो।

मोखां बिजाब आरो वाट्स-एपाव बर' रावखौ रमान हांखोजों रेबग्राया गावनि गोसोबादि रिसारथिफोरखौ बाहायनानै बर' सोदोबखौ रेबो आरो सानस्रिखौ फोरमायनो नाजायो। हानायमानि सुंद'थारै आरो गोख्रै बुजिनो हानायबादि रेबनानै फोरमायनो नाजायो। बेयाव जेन' सोदोब रेबग्राहा समानो थोआ थोआ। जेरै- /dg/ /दं/, /hya/ /हाया/, /mnc/ /मानसि/, /i/ /आइ/, /onty/ /अन्थाइ/ बायदि।

सानस्रि फोरमायनो रेबनाय रमान हांखोनि बर' सोदोबखौ गुबुन सासेया मिथिया एबा रोडाबो जानो हायो। बबेखानि सोदोबखौ रेबग्रा मानसिया गावनि गोसोनि लुबैनाय एबा गावनि बुजिनाय बादिल'बो रेबो आरो गावनि सानस्रिखौ गुबुननो फोरमायनो नाजायो। बे थासारियाव सानस्रि फोरमायजाग्राया बै सानस्रि फोरमायग्रानि गोसोज्लिदखौ हमदानो हाया जानो हागौ आरो नडाब्ला गोदान मावबाख्रिखौ बाहायजेनग्राया बद गैथ'वाबो जानो हायो। जेरै- /mc/ /मासि/, /prysli/ /फरायसालि/, /ngr/ /नागिर/ बायदि।

रमान हांखोजों मोखां बिजाब आरो वाट्स-एपाव रेबनाय बर' रावाव रिसारनि गुबै आखुखौ लानानै

हांखोखौ जथायनाय जाया। बुजिनो थाखायल' हांखोखौ जथायनानै रेबनाय जायो आरो बेयाव जाथारि हांखोआनो गुबुन मोनसे रिंसारनि रिंसारथियारि हांखो महरै बाहायजायो। जेरै- /kɪm/ /खालाम/, /khlɪm/ /खालाम/, /ai/ /आइ/, /ay/ /आइ/, /mau/ /माव/, /mao/ /माव/, /cmag/ /सिमां/, /simg/ /सिमां/, बायदि। गारां रिंसारनि हांखोखौ होआलासे रेबनानै सानस्रि फोरमायनाया मोखां बिजाब आरो वाट्स-एपाव जायो। बेबादि फोरमायोब्ला गारां रिंसारखौ हांखोजौं रेबनायनि समा उदां जायो आरो रेबनायाव थाबबो जायो। जेरै- /mnc/ /मानसि/, /bg/ /बिजि/, /bsr/ /बिसोर/।

सोदोबनि गिबि आरो जोबथा रिंसारनि रिंसारथियारि महरखौ रेबनानैल' मोनसे सोदोबखौ फोरमायनाय जायो आरो बेयो रिंसार जथायसेयारि सोदोबफोराव जायो। जेरै- /ag/ /आं/, /ng/ /नों/, /dg/ /दं/, /hr/ /हर/।

माखासे मोखां बिजाब आरो वाट्स-एपाव मावबाख्रिखौ बाहायगिरिफोरा आबुडै हांखोफोरखौ रेबनानै सोदोब दानानै ओंथि फोरमायो। बेयाव सानस्रि फोरमायग्रा सुबुडा खालि गारां गोरानि रिंसारनि महरखौ गुरैयैबो होनो हागौ। खाव गारां रिंसार आरो गारां रिंसारनि बिथिडावबो थावनि सोलाय-सोल' बाहायजानो हागौ। थेवबो आबुं रिंसारारि हांखो जथायनायखौ एंगारालासे सोदोबखौ सानस्रि फोरमायग्राया रेबो। जेरै- /okha/ /अखा/ ~ /oka/ /अखा/, /mauji/ /मावजि/ ~ /maoji/ /मावजि/, /bwtwr/ /बोथोर/ ~ /bwthwr/ /बोथोर/, /maynao/ /माइनाउ/ ~ /mainau/ /माइनाउ/, /hajwma/ /हाजोमा/।

बेबा मोनसे रिंसारनि रिंसारथियारि हांखोखौ नागारनानै सोदोबखौ रेबनानै सानस्रि फोरमायनाया जायो। बेबादि रेबनायाव माखासे एबा मोनसे गारां रिंसारा मोनसे थावनियाव एंगारना दोनजायोब्लाबो गुबुन थावनियाव बे एखे गारां रिंसारा एबा गुबुन मोनसे गारां रिंसारा एंगारना दोनजाया। बेबादि रेबजाग्रा रिंसारफोरनि मादाव गारां रिंसार फोरमायग्रा रमान हांखोफोर आरो /ng/ /ङ/ खौरां हांखोखौ मख'नो हायो। /ng/ खौरां रिंसारा /ङ/-खौ फोरमायो आरो बेनिनो मादाव मालाबा /n/ हारसिं, मालाबा /g/ हारसिंल' बाहायजायो एबा मोननै हांखोनि मादाव मोनसेल' बाहायजायो, बे आखुथाइयाव। जेरै-

| <u>सोदोब</u>          | <u>एंगारजानाय रिंसारथियारि हांखो</u> |
|-----------------------|--------------------------------------|
| /bugti/ /बुंथि/       | /n/                                  |
| /bunti/ /बुंथि/       | /g/                                  |
| /grwng/ /गोरों/       | /w/                                  |
| /mly/ /मालाय/         | /a/ /a/                              |
| /hba/ /हाबा/          | /a/                                  |
| /nwnsr/ /नोंसोर/      | /g/ /w/                              |
| /mnisrag/ /मिनिस्रां/ | /i/ /n/                              |
| /wnkri/ /ओंख्रि/      | /g/                                  |
| /jhwlaol/ /जोहोलाउ/   | /w/                                  |

|                |     |              |
|----------------|-----|--------------|
| /tag/ /थां/    | /n/ |              |
| /sku/ /सुखु/   | /u/ |              |
| /srse/ /सेरसे/ | /e/ | बायदि बायदि। |

## 12. लिरनाय आदब

मोखां बिजाब आरो वाट्स-एपाव लिरनानैसो रावखौ बुडो। बेयाव बांसिनै गारांनि जेबो गोनांथि जाया। गारां रावनि (भइस कल) हेफाजाबै फोरमायोब्लाबो बेयाव मानगोनां रावनिफ्राय जेबो फरागथि मोननाय जाया खालि रावसानि फारागथि बादियै सोदोबनि गुबुनथिखौल' मोनो। आरो बे सावरायनायाव रेबनायखौल' बांसिनै गोनांथिसिन होनाय जायो। मोखां बिजाब आरो वाट्स-एपाव बाहायगिरिफोरा गावनि गोसोबादि रावखौ रेबनानै फोरमायनो नाजायो आरो बेयाव मानगैयि रावनि महरा बांसिनै बाहायजानायखौ मोनो। सोदोबफोरा गुबैयै मानगोनांब्लाबो बेखौ रेबनायनि बिथिडाव मानगैयिबादि बाहायो। थामहिनबा रेबनायाव मोनबो थि खान्थि गैया, बाहायगिरिनि गोसोबादि सोलियो।

बर' हांखोजो (देबनोगोरि) रेबनानै बर' रावखौ मोखां बिजाब आरो वाट्स-एपाव बाहायो। बे बिथिडाव जेबो मानगैयि जाया। खालि मालाबा रेबनायाव रेनसननायल' जायो। जेबो मानगैयि हांखोफोरखौ बाहायनाय जाया। रावखान्थिनि नेमबादिनो हांखोखौ बाहायनानै बर' रावखौ रेबो आरो सानस्त्रिखौ फोरमायो। नाथाय बर' रावजो रेबनाय समाव थाद'सिनफोरखौ {(I), (.), (:), (-), (:), (!), (?), (')} नांगौबादियै बाहायनाय जाया। सानस्त्रिया फोरमायजाब्लानो जानायबादि मोनो सानस्त्रि फोरमायग्राया।

रमान हांखोजो रेबनायनि बिथिडावबो बे एखे आदबखौनो मोनो। रमान हांखोखौ गावनि गोसोबादि बाहायनानै रेबो आरो सानस्त्रिखौ फोरमायो मोखां बिजाब आरो वाट्स-एपाव। बेयाव मोनसे रिसारथिखौनो गुबुन रिसारथिनि हांखो एबा बबेबा रिसार ज'थाइनि हांखो महरै बाहायो। जेरै- /c/, /b/ /i/ /t/ हांखोफोर।

जाथारि सोदोबफोराबो मोखां बिजाब आरो वाट्स-एपाव बाहायजानो हायो आरो गुबुन गुबुन रावसानि ओनसोलाव थाग्रा बैफोर मावबाखिखौ बाहायनायाव गावसोरनि ओनसोलारि सोदोबफोरखौ बाहायो। बे बिथिडाव गुबुन रावसानि बेंखनाव थाग्रा बर' रावगिरिया बुजियाबो जानो हायो। मानगैयि रावारि सोदोबफोरा बाहायजानानै मोखां बिजाब आरो वाट्स-एपाव बाहायजानाय राव जानानै थायो। जायफोरखौ मोगथां समाजाव बाहाया।

मोखां बिजाब आरो वाट्स-एपाव बाहायनाय रावाव रेबनायाव जेबो थाद'सिनखौ बाहायनाय जाया आरो बेखौ बाहायाबाबो रेबग्राया गावनि सानस्त्रिखौ आबुडै फोरमायनो हानायबादि मोनो। आरो सानस्त्रिखौ बाहागो लाग्रा बाहायगिरियाबो बेखौनो थोजासे मोनो।

रेबनायनि बिथिडाव बाथ्राखान्थिखौ मानियालासे बर' रावखौ रेबनाय जायो। बेयो रमान एबा बर' हांखोनि जोहैनो जानो हायो। /मावग्रा + मावजाग्रा + थाइजा/ खान्थिखौ मानिनाय जाया।

रमान हांखोजों रेबनाय समाव रिंसार एंगारनानै सोदोबख्रौ रेबनानै सानस्त्रिखौ फोरमायनाया जायो मोखां बिजाब आरो वाट्स-एपनि जोहै। बे थासारियाव हांखोखान्थि, बानानखान्थि आरो महरखान्थि मानिनाय जाया। बर' रावखौ रेबनो थाखाय रमान हांखोनि थि रमानखान्थि दं बेखोबो बे समाव मानिनाय जाया। बर' रावखौ रमान हांखोजों रेबग्राया आरो फरायग्राया थामहिनबा सानस्त्रिखौ बाहागो लाग्रायाबो बेफोरखौ जेबो नांजाया। खालि सानस्त्रिखौ मिथिबानो जाबाय।

### 13. हांखो बाहायनायनि जाहोन

मोखां बिजाब आरो वाट्स-एपाव बर' रावखौ रेबनो थाखाय बर' रावारि मानसिफोरा बर' हांखो आरो रमान हांखो बाहायो। बेफोरखौ बाहायनायनि खाबु दंनाय-दडै दं। हांखोखौ बाहायनायनि बिथिडाव खाबु गोनां आरो गैयैखौ लानानै बाहायनाय जायो। मोखां बिजाब आरो वाट्स-एपाव लिरनाय हांखोनि हेफाजाब लानानै फोरमायनो थानायाव की-बर्डनि गोनांथि दं। जानबुडाव रेबनो थाखाय सानजुन्थिनि (computer) बादि की-बर्डखौ बाहायनाय जायो आरो हांखोखौ बेनि हेफाजाबै रेबनाय जायो।

### 14. बर' रावखौ जानबुडाव रेबनायनि बेखाबु

मोखां बिजाब आरो वाट्स-एपाव बर' रावखौ रेबनो थाखाय बर' रावनि जुनिया की-बर्ड गैया जेरै रमान हांखोनि थाखाय दं। बेनिखायनो हिन्दी एबा देबनोगोरि हांखो गोनां जौगा रावारिनि की-बर्डखौ बाहायनानैसो बर' रावखौ जानबुडाव रेबनो हायो आरो बेबादिनो मोखां बिजाब आरो वाट्स-एपावबो बर' रावखौ रेबनाया जायो। बे थासारियाव गुबुन रावनि की-बर्डखौ बाहायनो थानायाव नांगौ बादि मोनोब्लाबो आंगो गैयिबादि मोनो। फारसेथिं देबनोगोरि हांखोआरि रावनि एबा हिन्दी रावनि की-बर्ड बिलाइ मोननैनि बारा थायो आरो नांगौ जानाय हांखोखौ नायगिरनांगौ जायो रेबनाय समाव। बेबादिनो गोबाव सम लायो।

बर' रावखौ रेबनायाव देबनोगोरि हांखोआरि रावनि एबा हिन्दी रावनि की-बर्डखौ बारा जेनाबो गैया जानबुडाव। थारैनो बाहायबाय थायोब्ला गोलै जायो। 'गुगुल की-बर्ड' मुनि की-बर्डव भारतनि मोन नैजिनै रावनि की-बर्डखौ मोननाय जायो आरो बेयाव बर' रावारि की-बर्डखौबो मोनो। बे की-बर्ड बर' रावखौ जानबुडाव रेबनायाव मोजांसिन। सेटीनि लामाया गोब्राब जायो, बेखायनो गोबां बर' रावारिफोरखौ बे की-बर्ड बाहायना बर' रावखौ बर' हांखोजों रेबैखौ मोनो जानो हायो।

बर' रावखौ रेबनायाव गारां हांखोनि सिन होदेरनाय समाव गोबाव सम लायो आरो बेखायनो खायफा बर' हांखोजों बर' रावखौ मोखां बिजाब आरो वाट्स-एपाव बाहाया जानो हायो। माखासे बर' रावारि मानसिफोरा बर' रावखौ रायनो रोंबाबो रेबनो रोडा। बेनिनो मादाव बर' हांखोखौ सरसा खालामि बांसिन मानसिफोरा बर' हांखोखौ रेबनो रोडा। बेखायनो बर' रावारि मानसिफोराबो बर' हांखोजों रेबनाय जाया।

बर' रावखौ बर' हांखोजों रेबनो हायोब्ला बर'निनो गाहाम जायो; रावखौ सिनायथि होनो हायो। फेइसबुक आरो वाट्स-एपा खौरां बिजों हिसाबैबो खामानि मावो आरो बेखायनो रावखौ जौगाहोनो

हानायनि मोनसे जौसांसालि होन्नानैबो बैफोर मावबाख्रिफोरखौ बुंजायो। बेखायनो बर' रावजों फेइसबुक आरो वाट्स-एपाव रेबनाया गावनि रावखौ मान होनाय जानायजों लोगोसे गुबुननो दिन्थिसारना होनायबादि जायो।

### 15. इंराजि रावखौ रेबनायनि खाबु

इंराजि रावा मुलुगनाडारि जानायनि थाखाय गासै बिथिफोरावनो बे रावखौ बाहायनाय जायो आरो बे रावनि की-बर्डखौ नांगौबादियै मोननो हायो। बायदि रंगिना साजायनानै फोसावजानाय गोबां की-बर्डखौ बाहायनानै रमान हांखोखौ जानबुडाव रेबनो हायो। रमान हांखोआरि की-बर्ड मोनसे की-बर्डनि बिलाइयावनो गासिबो हांखो आरो अनजिमाफोरानो थायो। बेखायनो साबसिन सुबिदा गोनां रमान हांखोखौ रेबनो थाखाय। बेखायनो रमान हांखोखौ बर' हांखोनिफ्राय बांसिनै बाहायनाय जायो मोखां बिजाब आरो वाट्स-एपाव।

रमान हांखो रेबनायाव मोनबो गारां रिसार महरखौ दाजाबनो थाखाय जेबो हेंथा गैया। थामहिनबा जेबो गारां रिसार महर गैयैखाय थोंजोंनो गारां हांखोफोरखौ गुबुन खौरां हांखोनि उनाव रेबनानैनो हांखो जरायनाया रमान हांखोफोरनि गेजेराव जायो। बेबादि जानायनि थाखाय रमान हांखोखौ रेबनायाव खम सम लायो।

रमान हांखोखौ बांसिन मानसिफोरानो रोंखायो। लेखा रोडिफोरखौबो जानबुंनि थाखानाय की-बर्ड इंराजि जाखानायनि थाखाय सानफ्रोमबो गोहोम खोख्लैबाय थानानै इंराजि जोलैनि खालामना लाखाबाय। जायनि थाखाय इंराजिखौ रेबनो रोडाब्लाबो रेबनो हानाय जाबाय। बेबादिनो मोखां बिजाब आरो वाट्स-एपाव रमान हांखो बाहायनानै बर' रावखौ रेबनायनि बिसाना बर' हांखो बाहायनानै बर' रावखौ रेबनायनिफ्राय बांसिन। बर' हांखोआ इंराजि एबा गुबुन रमान हांखो बाहायग्रा रावफोरनि बादि जानबुंनि की-बर्डव थाखाया। बेखायनो रोडिफोरखौ गोहोम खोलैनो हाया।

### 16. सावरायसंनायनि फिथाइ

मोखां बिजाब आरो वाट्स-एपाव बाहायो बर' रावारिफोराबो आरो बेखौ बाहायनाय समाव गावनि सानस्रिखौ फोरमायबाय थानो थाखाय बर' रावखौ बाहायो। बर' रावखौ रेबनानै मोखां बिजाब आरो वाट्स-एपाव गावनि सानस्रिखौ फोरमायनाय बिथिडाव बर' आरो रमान हांखो मोननैखौबो बाहायनाया जायो। बे सावरायसंनायनिफ्राय बर' रावखौ मोखां बिजाब आरो वाट्स-एपाव बाहायनायनि खारिथिफोरखौ नोजोर होनानै खायसे गरन्थ'सिम फैनो हानाय जाबाय। बे सावरायसंनायनि बादियै मोननाय गरन्थ'फोरखौ गाहायाव फारियै रायफोरलांनाय जाबाय।

रमान हांखोखौ बर' रावारिफोरा बाहायनानै बर' रावखौ रेबनायनि बिसाना बर' हांखोजों बर' रावखौ रेबनायनि बिसाननिफ्राय बांसिन। बर' रावखौ रेबनो हानायनि रुजुनायाव मोखां बिजाब आरो वाट्स-एपाव

रमान हांखो रेबनायनि खाबुवा गोल्लेसिन आरो ससिन। इंराजि रावनि जानबुनि बाहायजाथाव की-बर्डफोरा गोल्ले आरो रोखा खावसेल' बिलाइनि जायो। नाथाय बर' रावखौ रेबनो हानायबादि गावनि असे की-बर्ड मोननाय जाया आरो बेखायनो मालाय रावनि की-बर्ड बाहायनानै रेबनो गोनां जायो लोगोसे बैफोर की-बर्डफोरा बिलाइसेयारि नडिलाय रमान हांखोजों रेबनायनि रुजुनायाव गोरसिन जायो। रमान हांखो रेबनायाव गारां हांनि मोनबो लेडाइ महर गैयैयाव गोख्रैसिन जायो आरो बर' रावनि बिथिडाव गारां हांखोफोरनि उफेरा गारां महर होफादेरनायाव सम लासिनो। रमान हांखोखौ बाजाबलायहोनो (जथाय महर) गोनांथि गैया, फारियै लिरोब्लानो जायो। नाथाय बर' रावनि बिथिडाव बाजाबहोग्रा बाहायनानै बाजाबलायहोनांगौ जानानै फैयो।

मोखां बिजाब आरो वाट्स-एपाव बर' हांखोजों बर' रावखौ रेबनायाव रावखान्थियारि खान्थि बाहायनानै रेबनाय जायो। रमान हांखोजों रेबनाय समाव जेबो रावखान्थिनि खान्थि मानिनाय जाया। मोनबो थाद'सिनखौ बाहायनाय जाया एबा बाहायनाय जानोबो हागौ बेनि जेबो गोरान्थि थाया। हांखो जथायनायनि बिथिडाव मोनसे बर' सोदोबखौ थि रिसार होनो हानाय हांखोखौ बाहायनाय जायाबो जायो। बेखौ बाहायग्राया गावसो थि खालामो आरो बाहायो। बुजिग्राया बिनि बाहायनायखौ सानस'नानै बुजिनाय जायो। बाथ्राखान्थि मानिनाय जाया। मावग्रा, मावजाग्रा, थाइजा बायदि बाहायनाया फारियै खान्थिबादि जाया। दाजाबदा एबा राव महर बाहायनायनि जेबो थि खान्थिखौ बाहायनानै मोखां बिजाब आरो वाट्स-एपाव रमान हांखोजों बर' रावखौ रेबनाय जाया।

रमान हांखोखौ मोखां बिजाब आरो वाट्स-एपाव बाहायनाय जायो आरो बेखौ गावनि गोसोबादि बाहायनानै बाहायगिरिया गावनि सानस्रिखौ बर' रावजों फोरमायनाय जायो। बबेखानि रावखौ रेबनानैसो मोखां बिजाब आरो वाट्स-एपाव बाहायनाय जायो आरो सानस्रिखौ गुबुननो बाहागो होनाय जायो। बर' रावखौ रेबनो थाखाय बाहायनाय इंराजिनि हांखो जथायनायखौ गुबुन सासेया सासेनिखौ बुजिनायबो जाया जानो हागौ। बेयो बाहायग्रानि मोखां बिजाबनि आरो वाट्स-एपनि राव आरो हांखो बाहायथिनि गियाननि सायाव सोनारो। बेखायनो रमान हांखो बाहायनानै बर' रावखौ रेबनाया मोनसे गावनि राव आरो हांखोबादि (इडिअलेक्ट एण्ड इडिअस्क्रिप्ट)।

मोखां बिजाब आरो वाट्स-एपाव बेफोरबादि रमान हांखो आरो बर' हांखो बाहायनानै गावनि सानस्रिखौ फोरमायनाय जायो बर' रावखौ रेबनानै। बेबादिनो सोलिगासिनो आरो सोलिबाय थागोन।

## 17. फोजोबनाय

मोखां बिजाब आरो वाट्स-एपाव बाहायनायाव बर' रावखौ रेबनो थाखाय बाहायगिरिफोरा रमान आरो बर' हांखोखौ बाहायो आरो बेबादिनो गावबा गाव सानस्रि एबा मोनदांथिफोरखौ बेजोंनो फोरमायो। बे

सावरायसंनायनि सायाव मोननाय खारिफोरा फरायगिरि आरो गोदान संजिरगिरिफोरखौ एसे थुलुंगा आरो मदद होगोन होनना मिजिं थिनो हायो। मोखां बिजाब आरो वाट्स-एपा गोनोखोनि आरोदायारि सोर्जिब्लाबो बेखौ सामलायनो थाखाय रावनि गोनांथि दं बेखौ बे सावरायसंनायनिफ्राय रोखा मिथिनो हायो। राव गैयाबा बिगियाननि मोनबो खामानिखौनो मावनो हायैबादि। रावनि सायाव सोनारनानै दिनैनि बिगियाननि सोर्जि माखाफोरा जादों। मोखां बिजाब आरो वाट्स-एपा बादि मावबाख्रिफोरा (एप्स) राव नडामोनब्ला जेबो उदायि आरो गावनो मोनसे मोगथां समाजनि बायजोआव गावनो गोदान समाज सोर्जिनानै सुबुंखौ थांनानै थानो खाबु होनो हाया। जेरै मोखां बिजाब आरो वाट्स-एपाव बर' रावारि सुबुंफोरा गावसोरनो हान्जा खुलिना जिउ खुंगासिनो, नखर खुलिना जिउ खांगासिनो दं (ग्रुफ आरो एकाउन्ट/फ्रफाइल)। बेफोरो बर' राव एबा जायखिजाया रावनि थाखायनो जादों। बेखायनो बर' रावखौ एबा जायखिजाया रावखौनो मोखां बिजाब आरो वाट्स-एपाव बाहायनाय जायो। बेखायनो रावनि फरायसंनायखौ बैफोर मावबाख्रिनि सायाव नांगौथि दं।

### हेफाजाब आरो खारि फुंखा

- चैनारी, स्वर्ण प्रभा. 2006. *बर' रावखान्थि*. धिरेनपारा, गुवाहाटी : गुमुर पाब्लिकेशन.
- नार्जारी, दुरजय फाहार. 2012 *नैथि फेहेरनाय बिसान. राव बिगियान*. कक्राझार, आसाम : एन.एल. पाब्लिकेशनज.
- नार्जी, भबेन. 2003 साफायफिननाय. *बर' कसारिनि समाज आरो हारिमु*. पानबाजार, गुवाहाटी : बीणा लाइब्रेरी.
- बसुमतारी, फुकन चन्द्र. 2005. *बर' रावनि महस्खान्थि*. धिरेनपारा, गुवाहाटी : गुमुर पाब्लिकेशन.
- बसुमतारी, फुकन चन्द्र. 2017. *राव बिगियाननि फरा*. बर'मा, बाक्सा : निलिमा प्रकाशनी.
- बसुमतारी, राजेन्द्र कुमार. 2002. *राव बिगियान*. दरं, आसाम : श्री भजेन चन्द्र बर'.
- ब्रह्म, कमल कुमार. 1972. *गोनां रावखान्थि*. पानबाजार, गुवाहाटी : बीणा लाइब्रेरी.
- लाहारी, मन' रन्जन. 1996. *बर' थुनलाइनि जारिमिन*. कक्राझार : अनसुमै लाइब्रेरी.
- Baro, Madhu Ram. 1990. *The historical development of Boro language*. Panbazar, Guwahati: Bina Library.
- Basumatary, B.C. 2009. *Bodo Civilization in India*. Kokrajhar : Ganda Offset Press.
- www.facebook.com; 2021
- www.google.com; 2021